

# Pemantauan berterusan dilakukan - MPSJ



**ASMAWI Kasbi (kiri) melepaskan para peserta pada Program Kayuhan Hidup Sihat MPSJ Siri 3/2013 di Serdang, Selangor, kelmarin - UTUSAN/WAHIDAH ZAINAL**

SUBANG JAYA 12 Mei - Majlis Perbandaran Subang Jaya (MPSJ) akan melakukan pemantauan secara berterusan di Pangsapuri Beringin, Puchong, dekat sini bagi mengelakkan kejadian tanah runtuh 26 Mac lalu berulang.

Yang Dipertuanya, Datuk Asmawi Kasbi berkata, pemantauan itu akan dilakukan dengan kerjasama Institut Kerja Raya Malaysia (Ikram) bagi memastikan kawasan terlibat benar-benar selamat.

"Kita berharap tiada lagi kejadian seumpama ini berlaku kerana ia melibatkan keselamatan penduduk," katanya.

Beliau berkata demikian dalam sidang akhbar selepas merasmikan Program Kayuhan Hidup Sihat MPSJ Siri 3/2013 di Universiti Putra Malaysia (UPM), dekat sini hari ini.

Dalam kejadian tanah runtuh itu, seramai 228 penghuni di Blok B, Pangsapuri Seri Beringin, terpaksa dipindahkan ke Dewan MPSJ berhampiran berikutan kawasan itu tidak selamat untuk didiami.

Selepas hampir dua minggu pendudukan terlibat dibenarkan pulang ke kediaman masing-masing setelah mendapat persetujuan MPSJ.

Mengulas mengenai program tersebut, Asmawi berkata, program anjuran bersama MPSJ dan UPM itu diadakan bertujuan menerapkan gaya hidup sihat di kalangan masyarakat melalui aktiviti sukan kayuhan basikal secara berkumpulan.

"Selain itu, melalui program seperti ini ia mampu meningkatkan imej MPSJ selaku pentadbir perbandaran yang mesra rakyat dan alam sekitar.

"Program ini juga dilihat berupaya menggalakkan penggunaan basikal untuk tujuan riadah," ujarnya.

Sementara itu, Presiden Persatuan Pegawai Akademik UPM Prof. Dr. Ahmad Ismail berkata, program yang dianjurkan itu berbentuk santai dan bukan perlumbaan.

"Seramai 80 peserta yang terdiri daripada 50 pelajar UPM dan 30 kakitangan MPSJ menyertai program kayuhan ini.

"Para peserta akan berbasikal secara berkumpulan sejauh 30 kilometer mengelilingi keseluruhan kawasan kampus UPM dan kawasan perumahan Seri Serdang," katanya.

Program kayuhan tersebut bermula pada pukul 8 pagi dan berakhir kira-kira 12 tengah hari.